



**JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIAL**

*Komunikadu Imprensa*

**Períodu : Abril 2011**

**Edisaun : 26 Abril 2011**

**Komemorasaun aniversáriu JSMP ba dala X no Tomada de Posse ba Diretór  
Ezekutivu no Vise Diretór JSMP ba periodu daruak**

Loron 28 de Abril komemora nu'udar loron aniversáriu JSMP nian. Ba tinan ida ne'e, JSMP komemora nia aniversáriu ba dala X ho eventu seluk hamutuk ho tomada-de-posse ba renomeasaun ba pozisaun Diretór Ezekutivu no Vise Diretór JSMP ne'ebé re-eleitu hodi lidera instituisaun JSMP ba tinan rua oin mai. Mandatu ne'e sei hahú husi tinan 2011 to'o tinan 2013.

Tuir lolos aniversáriu ne'e hala'ó iha dia 28 Abril, maibé tanbá asuntu ida ka rua ne'ebé mak la bele husik iha loron refere, equipa JSMP tomak hamutuk ho BOARD decide atu selebra loron ne'e iha loron 26 de Abril 2011 no iha tempu hanesan hala'o mos Tomada-de-Posse ba Diretór Ezekutivu no Vise Diretór JSMP.

Representante BOARD JSMP ho votus maioria decide atu re-nomeia fali Diretór no Vise Diretór ba pozisaun refere tanbá artigu 18 Estatutu JSMP nian fo dalan ba re-nomeiasaun pozisaun ba mandatu segunda vez. Desizaun ne'e hetan apoiu maka'as husi funsionáriu tomak iha JSMP rasik. Desizaun ne'e foti iha loron 11 de Janeiru 2011<sup>1</sup> atraves husi akta ne'ebé mai husi Board JSMP nian depoisde halo avaliasaun ba relatóriu atividade no programa durante mandatu primeriu ne'ebé hatudu progresu no dezempeñu ne'ebé produz iha periodu mandatu primeiru nia laran. Relatóriu ne'e hatudu katak, durante tinan 2009-2011 iha mudansa signifkativu iha aspeitu jestaun no lideransa JSMP nian nomós papél no kontribuisaun ba setór justisa ne'e rasik.

Diretór Ezekutivu JSMP Luis de Oliveira Sampaio haktuir iha selebrasaun ba loron aniversáriu no tomada-de-posse ne'e katak durante periodu segundu tuir mai JSMP sei kontinua halo esforsu hotu ne'ebé posivel atu kontinua hametin apoiu ba setór justisa liu husi konsolida relasaun ho autoridade no entidades relevantes iha setór justisa nian no mobiliza apoiu husi Públiku atu fo sira nia kontribuisaun ba setór justisa.

Tuir nia katak setór justisa tenki hatur hanesan obra kolektivu no asuntu ne'e partensia ba sociedade tomak nia responsabilidade. Públiku no soseidade Timór Léste tomak, tantu individu

---

<sup>1</sup> Akta prolongasaun ba mandatu Diretór Ezekutivu nomós ba Vise Diretór JSMP

ka grupu, entidades Públiku ka privadu, observador, akademista, pratisionáriu, no sosiedade tomak tenki sente no sai nain ba setór justisa ne'e rasik.

JSMP konsiente katak esforsu no komitmentu atu hari'í no hametin prinsipiuEstadu de Direitu (Estadu tuir Lei), prinisipiu indenpencia sistema judisiáriu, separasaun poder, promosaun ba valores direitus umanut no protesau ba grupu vulneravel sira la bele mai deit husi ema ida nian deit ka lara-metin ba kapasidade instituisaun ida ka rua deit. Esforsu no komitmentu ne'e tenki mai husi ema tomak ka husi komponente tomak.

JSMP konvensidu katak ho kolaborasaun diak no vontade polítiku husi entidades tomak ne'ebé hakna'ar -an iha área judisiáriu no Públiku em jerál sei bele produz impaktu signifkante ba área judisiriu ne'e rasik. Tanbá ne'e, JSMP enkoraza komponentes tomak atu bele servisu iha espíritu kolektivu atu hari no hametin setór justisa.

JSMP ho laran haksolok tebes hakarak agradese ba doadores sira hotu, aktuál no anterior ne'ebé fo apoiu ba JSMP atu kontinua kaer no halo servisu ida ne'ebé dala barak sensitivu no kontroversial ne'e. Tanbá ita boot sira nia apoiu JSMP bele eziste no kontinua servisu atu garante justisa ba ema hotu no ohin lora kompleta tinan X ona.

Ba oportunidade ida ne'e, lori JSMP nia naran konvida kolega *funsonáriu antigu JSMP* nian atu kontinua apoiu JSMP tuir ita boot sira nia biban hodi hadia diak liu servisu ne'ebé durante hala'ó ona.

Nune'e mos, aporoveita oportunidade ida, atu agradese no louva autoridade judisiáriu<sup>2</sup> sira hotu; ne'ebé durante ne'e halo ona esforsu hotu ne'ebé disponivel atu garante justisa ba sira ne'ebé buka justisa. JSMP kontinua enkoraza entidades hot-hotu, individu ka lori instituisaun nia naran, mezmua atravez no infrenta dezafiu oi-oin maibé dedika sira nia atu kumpri sira nia dever hodi halo servisu tuir Lei no Konstituisaun haruka.

Liu tan, JSMP hakarak hato'o apresisaun boot tebes ba kontribuisaun media hot-hotu: massa no elektroniku ne'ebé fo ona sira kontribuisaun atu hametin setór justisa no lori lian JSMP nian to'o ba Públiku.

Konsidera katak setór justisa sei hasoru dezafiu oi-oin, tanbá ne'e JSMP husu ba organizasaun ka ajensia fundu sira ne'ebé durante ne'e kontribui hodi investe ba setór justisa atu kontinua fo apoiu ba JSMP. Tanbá apoiu ba JSMP signifika apoiu ba servisu atu garante justisa ba ema hotu.

---

<sup>2</sup> Tuir Artigu 1 (2) Kódigu Prosesu Penál Timór Léste nian defini katak autoridade judisiáriu mak Juiz no prokurador sira.

JSMP promete katak tinan 2011 ba oin ka pelo menus durante periodu mandatu segundu ne'e, JSMP sei mobiliza apoiu Públiku ba setór justisa no sei halo reuniaun ka audensia oin-oin ho autoridade Estadu, sosiedade sivil no Igreja no komponente hotu ne'ebé partensia ba setór ida ne'e no konvense sira katak setór justisa ida ne'ebé forte sei sai aspeitu xave ida ba dezemvolvimentu nasional nian.

Obrigado ba ita boot sira nia atensaun.

Atu hetan informasaun kle'an favor kontaktu direktamente:

Roberto da Costa Pacheco

Prezidênte Sekretariadu JSMP

Diresaun E-mail: [bebeto@jsmp.minihub.org](mailto:bebeto@jsmp.minihub.org)

Landline: 3323883

Ka;

José Maria Moniz

Vise Prezidente Sekretariadu JSMP

Diresaun E-mail: [moniz@jsmp.minihub.org](mailto:moniz@jsmp.minihub.org)

Landline:3323883